



नेवा: देय् दबूया नाय: पदय् प्यम्हेसिया उम्मेदवारी पदाधिकारीपिनि नाय: पदया निंतिं हानथाप

• लहना संवाददाता

नेवा: तयगु राष्ट्रिय संगठन नेवा: देय् दबूया च्याक्व:गु त:मुँज्याय् जुइगु तिथि न्ह्य:ने वयाच्चंगु दुसा नाय: पदय् उम्मेदवार घोषणा यायेगु ज्या नं जुयाच्चंगु दु। आ: तक सीदु कथं नाय: पदया लागिं वर्तमान नाय: पवित्र वज्राचार्य, वरिष्ठ उपाध्यक्ष चन्द्रलाल राजभण्डारी, मिसा उपाध्यक्ष रश्मिला प्रजापति व महासचिव सत्यनारायण डंगोल उम्मेदवारी बीगु धका: सार्वजनिक रुपं घोषणा यायेधुंकूगु दु। उम्मेदवारी बियाच्चर्पिं प्यम्हं हे देय् दबूया वर्तमान कार्यसमितिया पदाधिकारीत ख:।

देय् दबूया थुगुसीया त:मुँज्याय् चुनाव मयासे सर्वसम्मत नेतृत्व ल्येगु लागिं जूगु कुत: ता:लाये मफयेवं प्यम्ह उम्मेदवारत मैदानय् कुहां वइगु अवस्था ब्वलंगु ख:।

आ: वइगु कार्यकालया लागिं वर्तमान नाय: पवित्र वज्राचार्ययात हे नाय: कायम याना: मेपिं पदाधिकारीत नं थ:थ:गु हे पदय् च्वना: जिम्मेवारी काये माली धका: देय् दबूया पुर्लापिं नाय:पिं लिसें सल्लाहकारतय्सं त:गु चरणय् सहलह या:गु ख:सां उम्मेदवार



पवित्र वज्राचार्य



चन्द्रलाल राजभण्डारी



रश्मिला प्रजापति



सत्य नारायण डंगोल

जुइपिं सुं हे सहमत मजुइवं सकलें हे मैदानय् कुहां वंगु ख:।

वर्तमान नाय: पवित्र वज्राचार्य थ:गु कार्यकालय् शुरु यानागु छुं ज्याखँत सम्पन्न याना: मेगु छुं महत्वपूर्ण ज्या शुरु यायेगु थ:गु योजना न्ह्य:ने हयादीगु दु। वय्कल नेवा: देय् दबूया छँ छ्वा दनेगु थ:गु योजना कार्यान्वयनया चरणय् दुगु धासें आ: उकियात सम्पन्न यायेगु दायित्व नं थ:गु हे जूगुलिं उम्मेदवारी बीमा:गु खँ धयादिल।

उकथं हे वय्कल बागमती प्रदेशय् नेपालभाषायात कामकाजीया भाषाया रुपय् कार्यान्वयन यायेगुलिं

नं ज्या यायेमा:गु अवस्था दुगु धासें भाषा विधेयक कार्यान्वयन कार्यदलया थ: दुज: नं जूगुलिं याना: नं थम्हं उम्मेदवारी बीमा:गु खँ धयादीगु दु।

लिसें वय्कल थ: देय् दबूया नाय: जुइधुंका: व्यावसायिक रुपं लिउने लानाच्चर्पिं नेवा:तय्त् ग्वाहालि जुइ कथं थम्ह नेपाल उद्योग वाणिज्य व चेम्बर अफ कमर्स नाप सहकार्य यानागु व उकियात पूरा यायेवं दायित्व ल्यँ दनिगुलिं नं उम्मेदवारी बीमा:गु खँ धयादिल।

वय्कल थ:गु हे कार्यकालय् मनमोहन हस्पिटलय् नेवा:तय् वास:

यायेगुलिं छुटया व्यवस्था यानागु व मेगु थीथी स्वास्थ्य क्षेत्रय् नं उगु कथंया छुटया व्यवस्था याकेगु ज्या ल्यँ दनिगुलिं याना: नं थम्हं हाकन उम्मेदवारी बीमा:गु खँ धयादीगु दु।

अथे हे मिसा उपाध्यक्ष रश्मिला प्रजापति देय् दबुली न्हापांम्ह मिसाम्ह नाय: वये मा:गु दावी यासें उम्मेदवारी घोषणा यानादीगु दु वय्कल देय् दबूयात संघीय प्रणाली कथं केन्द्र, प्रदेश जिल्ला नगर जुया: त्वा:त्वालया तर्क विस्तार जुइधुंकूगु देय् दबूयात चलायमान यायेगु निंतिं थम्हं उम्मेदवारी बियागु खँ धयादीगु दु।

वय्कल समुदायया थीथी क्षेत्रय् मिसा नेतृत्व स्थापित यायेत थम्हं भूमिका म्हिता वयाच्चनागु खँ कनादिसे देय् दबुली न्हापांखुसी थम्हं मिसा उम्मेदवार बियागु खँ नं धयादीगु दु। वय्कल मिसापित सशक्तिकरण याना: संगठनया हितय् सदुपयोग याना: संगठनयात रुपान्तरण यायेगु निंतिं थम्हं उम्मेदवारी बियागु खँ धयादीगु दु।

मेखे महासचिव सत्यनारायण डंगोल देय् दबूयात ल्याय्म्ह पुस्तां न्ह्याके मा:गु दावी सहित उम्मेदवारी घोषणा यानादीगु दु। वय्कल नेवा: जातिया आर्थिक व समाजिम समृद्धिया निंतिं अभियान न्ह्याकेगु। नेवा: संस्कृतिमा माध्यम आर्थिक समृद्धिया अभियान न्ह्याकेगु। देय् दय्केगुया लिसे समाजिक उत्थानय् नेवा: जातिया योगदान व भूमिकाया ऐतिहासिक लिसे प्राज्ञिक अध्ययन यायेगु आदि खँ थ:गु चुनावी प्रतिवद्धता प्वंकादीगु दु। वरिष्ठ उपाध्यक्ष चन्द्रलाल राजभण्डारी थ:गु चुनावी एजेण्डा सार्वजनिक यानादीगु मदुनि। नेवा: देय् दबूया च्याक्व:गु त:मुँज्या थ्वहे वइगु जेष्ठ २ निसे ४ गते तक कासासोतीइ याइगु जूगु दु।

संविधान बिउगु अधिकार छ्यलेमा: - उपप्रम सिंह



लहना वा:पौ/भाषा, संस्कृति व पहिचान ल्यंकेत मंका: कुत: याना वयाच्चंगु नेवा: समुदाय दुनेया स्यस्य: समाज यलया वंगु शनिवा: ११ क्व:गु स्थापना दिवस न्यायेकूगु दु। छगू दशकनिसे संगठित रूपय् न्ह्यानाच्चंगु समाजं थुगुसी त:जिक स्थापना दिवस न्यायेकूगु ख:। नेवा: समुदाय दुने शिक्षा, रोजगार व व्यापारया ल्याखँ न्ह्य:ने ला:सां नं भाषा, संस्कृति व पहिचान मदयेक समृद्धिया अर्थ मदुगु धासें सार्वजनिक वृत्तय् थ:गु उपस्थिति क्यनेगु ल्याखँ

थीथी ज्याइव: याना: स्थापना दिवस न्यायेकूगु ख:।

‘भी स्यस्य:’, भी नेवा:, भीगु परम्परा, भीगु म्हासिका, फुक्कं नेपा:मि छप्पं, छप्पं हे भीगु राष्ट्रिय’ धइगु मू नारा बिया: स्थापना दिवस न्यायेकूगु ख:।

स्थापना दिवसया उलेज्या यासें उपप्रधानमन्त्री लिसे सहरी विकासमन्त्री प्रकाशमान सिंह संविधान बिउगु अधिकार व उपलब्धियात अभ्यास यासें ल्यं ७ पेजय्



शान्तिनायक शाक्यमुनि गौतमबुद्धको
जन्म, सम्बोधिलाम तथा महापरिनिर्वाण दिवस

२५६८ औं बुद्धजयन्ती

श्रद्धापूर्वक मनाई पुण्य संचय गर्नुहोस् ।

२०८२ बैशाख २५ गते सोमबार

बुद्धजयन्ती समारोह समिति २५६९

आनन्दकुटी विहार, स्वयम्भू

नगर कार्यालय: श्रीघ: विहार, न:धल टोल, काठमाडौं

फोन नं. ५९१५६९६

ईमेल: buddhajayanti@gmail.com





नेवाः राष्ट्रिय म्ये

चमि : दुर्गालाल श्रेष्ठ लय् चिनामि : तिर्थ माली

धुन देने धुन सँन्त्यलं भी फुक्कं हे छम्ह जुइ धुन
भीगु लागाय् भी स्वयं हे जः जुया धुन लुइ धुन
ह्यांगु भुमिइ अष्टमण्डल ह्यांगु चाः दुने थी नगु
भीगु नेवाः ध्वाँय् थ्व हे खः ज्यान भी सकस्यां छगू
जातितय् स्वायत्त राज्यं लुइ कपं च्वय् भिलिमिलिं
राष्ट्र भःभः धाय्क न्त्याके भीगु चःतिं भीगु हिं

सम्पादकीय



कर्मचारी याना न्यायलय बदनाम जुइमज्यु

संघीय संसदय् प्रतिनिधित्व यानाच्वंगु जनमत पार्टी व नागरिक स्वतन्त्रता पार्टी दथुइ एकीकरण यायेगु नितिं घोषणा यायेत प्रज्ञा प्रतिष्ठान जूगु ज्याभूवः दथुइ पुलांम्ह सांसद रेशम चौधरीयात ज्वंगु खः । प्रहरी चौधरीयात ज्वनेगु आधार कथं छ्यःगु सर्वोच्च अदालतया पौ नक्कली जूगु लुया वयेवं चौधरीयात ज्वनेत पौ च्वःम्ह शाखा अधिकृत महिमानसिंह विष्टयात हिरासतय् काःगु दु । अदालतया छम्ह शाखा अधिकृत नक्कली पौ जारी यायेगु व उकिया आधारय् प्रहरी छम्ह नागरिकयात ज्वनेगु प्रचलनं नेपाःया न्याय प्रशासन व प्रहरीया व्यावसायिक क्षमतायात कयाः गम्भीर न्त्यसः ब्वलंगु दु ।

चौधरीयात भाद्र २०७२ य् टिकापुरय् जूगु हिंसात्मक घटनाय् दोषी ठहर यासँ स्वंगू तह्या अदालतं जन्मकैदया सजाय न्यंकूगु खः । तर, २०८० या जेष्ठ १५ गते गणतन्त्र दिवसया लसताय् सरकारं ब्यूगु आममाफीया आधारय् वय्कःयात जेलं त्वःतूगु खः । आममाफी विरुद्धया रिट सर्वोच्च अदालतय् विचाराधीन जुयाच्वंगु इलय् ‘राष्ट्रपतिं ब्यूगु आममाफी हिलेफुगुलि आः हे जेल छ्वया ब्यू’ व्यहोराया पौ प्रहरीया थाय् थ्यःगु खः । थुगु घटनां न्याय प्रशासनय् ज्या याइपिं मनूतय्गु नियत व मानसिकता गज्याःगु खः धइगु खँ पिहावःगु दु । बिष्ट अदालतया भ्वँ, लेटर प्याड, स्टाम्प छ्यलाः मेमेगु राज्यया निकाययात पौ च्वयेगु शैलीं बेन्चया फैसला पूर्व निर्धारण यायेगु इबलय् न्याय प्रशासनय् नैतिक अभिमुखीकरणया गये च्वं धइगु न्त्यब्वःगु दु ।

प्रहरी सार्वजनिक थासं नागरिकयात ज्वनाः सनकी व तर्कहीन पौया आधारय् जेलय् यकेगु अस्वभाविक ज्यां राज्य संयन्त्रय् स्वयेगु मिखा पाःगु दु । प्रहरी भविष्यय् थज्याःगु फैसला ‘अनिवार्य’ जुइगु दाबी यासँ वयात जेलय् छ्वयेत ‘इनाप’ याःगु पौय आधारभूत समझदारी तर्क मबिसे चौधरीयात गिरफ्तार यायेगु ज्या अनुचित खः । गुगुं नं अदालतपाखें वःगु आदेश वा इनापयात विश्लेषण यायेगु विवेक प्रहरीयाके दयेमाःगु खः । तर प्रहरी विवेक छ्यलेगु ज्या मजुइवं प्रहरी प्रति नागरिकयात निराश जूगु दु । अथे हे प्रहरी प्रधान ज्याकुथि अन्तर्गत नं ‘क्राइम रेकर्ड सिस्टम’ दु । न्यायिक प्रक्रियापाखें दोषी ठहर जुइमा वा निर्दोष जुइमा, मुद्दा चरणं वनेधुकूह मनूया अपराधया विवरण/आन्दोलन व प्रकृति डिजिटल प्रणालीइ दुथ्याकातःगु दु ।

संघीय संसदय् प्रतिनिधित्व दुगु दलतय्गु एकीकरणया घोषणा बैठक जुइ न्त्यः हे जूगु घटनायात कयाः नं पार्टीया नेतातय्सं राजनीतिक षडयन्त्र जूगु आशंका याःगु दु । निगू पार्टी एकीकरणं सत्ता राजनीतिया अंकगणित हिले फइगु जूगुलिं शाखा अधिकृत विष्टयात छ्यलाः एकता त्वाःथलेत स्वयाच्वंगु आशंका नं ब्वलंगु दु ।

रेशम चौधरीया गिरफ्तारी कानूनी न्त्यसः जक मखु, थ्व लोकतन्त्र, नागरिक अधिकार व राज्यया यन्त्रया जवाफदेहितालिसे स्वाःगु विषय खः । यदि थ्व घटनायात शाखा अधिकृत विष्टया सनकया चिचीधंगु घटना जक धकाः खारेज यात धाःसा कन्ह्य् हरेक नागरिक रेशमया स्वयां तःधंगु दुर्भाग्यया सामना यायेत बाध्य जुइ ।

नक्कली पौया आधारय् चौधरीयात हथासं गिरफ्तार याःगु ज्यां नं नेपाल प्रहरीया व्यावसायिक कार्यशैलीया भण्डाफोर जूगु दु । सुं नं अभियुक्त व अभियुक्तया अभिलेख जाँच मयासे ज्वनेत हथाय् चाःपिं प्रहरी थुकथं ग्वःम्ह निर्दोष मनूतय् हिरासतय् तःगु दु ? थुगु न्त्यसःया समाधान यायेत घटनाय् दुथ्याःपिनिगु अनुसन्धान यायेमाःगु आवश्यकता दु । शाखा अधिकृत विष्टयात जक दोष बियाः मेपिंत थुलि तह्या गम्भीर लापरवाहीं मुक्त यायेगु सम्भव मदु । थुगु शृंखलाय् दुथ्याःपिं सकसिंत निष्पक्ष अनुसन्धान जुइमाः । थ्व विशुद्ध व्यक्तिगत सनक जूसां नं थुकिया पुष्टि यायेत घटनाया विस्तृत अनुसन्धान यायेमाः ।

सगरमाथा व माउण्ट एभरेष्ट मखु चोमोलुङ्मा



श्रीकृष्ण महर्जन नेवाः

प्रधानमन्त्री केपी ओलीं हलिमय् दकलय् तःजाःगु च्वापुगुंयात माउन्ट एभरेस्ट मध्यासे सगरमाथा हे धायेमाः धकाः धयादीगु खँ पहिचान नाप स्वापू दुगु खँ खः । वय्कलं छुं दिं न्त्यः छगू ज्याभवलय् न्वंवासं सगरमाथाया नां गथे जुयाः माउण्ट एभरेस्ट जुल ? थः हे अजूचाल धकाः धयादीगु खः । ‘सगरमाथाया च्वाक्य् थ्यंकादीम्ह नं मखु, अयुनं छु जुया एभरेस्ट नां तल ? नां निगू निगू जुइमखु । नां धइगु छगू हे जक जुइ । व धइगु सगरमाथा हे खः’ धकाः तर्क प्रधानमन्त्री ओलीं धयादीगु खः । प्रधानमन्त्री ओलीं माउण्ट एभरेस्ट धाये मज्यू सगरमाथा हे धायेमाः धकाः सार्वजनिक रुपं न्वंवानादीवं हलिमय् हे दकलय् तःजाःगु च्वापुगुंया नांया बारे चर्चा जुयाच्वंगु दु । सगरमाथायात अनया आदिवासी शेर्पातसं नापं तिब्बती भाषां तर्क चोमोलुङ्मा धाइगु खः । नेवाःतसं गुलुभाः छः धायेगु याना वयाच्वंगु खःसा थीथी देशय् चर्चिसं माउन्ट एभरेस्ट धायेगु याना वयाच्वंगु खः । थुगु कथं नांया बारे चर्चा जुयाच्वंगु अवस्थाय् सगरमाथाया नां वास्तवय् छु खः ? छु जुया माउण्ट एभरेष्ट जुल ? अले शेर्पा भाषां चोमोलुङ्मा धाःगु छु खः धकाः सकसिगु चिउता क्यनिगु स्वाभाविक हे खः ।

सगरमाथा हलिमय् दकलय् तःजाःगु च्वापुगुं खःसा थुकिया उचाई समुद्री सतहलं ८,८४८.८६ मिटर (२९,०३१.६९ फिट) दु । सन् ८ डिसेम्बर २०२० न्त्यः थुकिया समुन्द्र सतहलं ८,८४८ मिटर कथं नालातःगु खः । सगरमाथा नेपाःया कोशी प्रदेश दुने सोलुखुम्बु जिल्लाया खुम्बु पासाङल्हामु गाउँपालिकाय् लाः ।

चोमोलुङ्मा नां

सोलुखुम्बुया जःखःया आदिवासी शेर्पातसं नापं तिब्बती भाषां सगरमाथाया नां चोमोलुङ्मा खः । उगु लागाय् आदिवासीत राईनिसें शेर्पातसं तर्क चोमोलुङ्मा हे धाइगु खः । शेर्पा भाषां चोमोलुङ्माया अर्थ धइगु ‘मां पहाडया देवी’ धैगु खः । चोमोया अर्थ देवता बाय् देवी अले लुङ्मा धइगु अर्थ पहाड अर्थात गुं खः । थ्व हे निगू खँवःपाखें हे चोमोलुङ्मा नां जुयाच्वंगु खः धाइ । थुगु अर्थय् स्वल् धाःसा व च्वापुगुं धइगु गुंया देवी धइगु अर्थय् खनेदु खनेदु । अथे नेवाःतसं नं गुलुभाः छः धाःगु अर्थात् सगरमाथायात छःया रुपय् हे नाला वयाच्वंगु खनेदु ।

सगरमाथा नां

चोमोलुङ्मा यात नेपालीकरण धकाः बाय् खसआर्यकरण याःगु अवस्थाय् सगरमाथा जूवन । ‘सगर व माथा’ खँवःपाखें हे सगरमाथा नां तःगु खः । थुकिया अर्थ सर्गतय् थिइगु शिखर खः धाइ । गगु इतिहास शिरोमणि बाबुराम आचार्य थुगु नां तःगु खः । ‘सगर’ व ‘माथ’ खँवः संस्कृत भाषं वयाच्वंगु खः । वि. सं. २०१२, सन १९५६ सं बाबुराम आचार्य सगरमाथा नां तयाव्यूगु खः । सगरमाथाया मेगु नां भ्यामोलोङ्मो नं खः धकाः आचार्य नं च्वयादीगु दु ।

माउण्ट एभरेस्ट नां

सन् १८०९ सं कुमाउक्षेत्र मालेगु नितिं पिहांवःम्ह डब्लूएस वेबं नेपाःया धौलागिरी हिमाल ८ हजार मिटरसिवें च्वय् दुगु खँ लुइकादिल । अबले दकलय् तजाःगु हिमाल धौलागिरी ८ हजार १ सय ७२ मिटर खः धाल । थुगु च्वापुगुं नापे यायेवं हलिमय् हे दकलय् तजाःगु च्वापुगुं खः धाल । लिपा सन् १८४८ स कञ्चनजङ्घाया जा नापेयात । उकिया जाः ८ हजार ५ सय ८६ मिटर धकाः पिकाल । अले हलिमय् हे दकलय् तजाःगु च्वापुगुं थ्व हे खः धकाः धाल । उगु हे दय् मेमेगु च्वापुगुंया नं नाप जुल । रेकर्डत मुंकाः फूक्कं सर्वे अफ इन्डियाया ज्याकुथिइ छवल । उकिया स्वर्दं लिपा सन् १८५२ सं सगरमाथा हलिमय् हे दकलय् तजाःगु च्वापुगुं ठहर जुल । सगरमाथायात रोमन संकेत चिं ‘पिक १५’ नां बिल । सन् १८५२ पाखे गुंया उचाई ‘कियोडा लाईट’ यन्त्र छ्यला नापे यानाच्वंगु भारतया सर्वे विभागं छगू पुचःया दुजःपिं मध्ये छम्ह बंगाली नागरिक राधानाथ सिकन्दरं थःम्हं हलिमय् हे दकलय् तजाःगु च्वापुगुं लुइकागु दाबी यानादिल । राधानाथया ग्वहालिमिया रुपय् हेनेसी नांया मिसा नं दु । राधानाथ प्रतिभाशाली गणितज्ञ खः । सर्वे अफ इन्डियासं जारीर जुयादीगु इलय् भिगुदं जक दुम्ह खः । सर्वोच्च शिखरया उचाइ नाप यायेगु विधि बेलायतया इन्जिनियर जर्ज एभरेष्ट विकास यानादीगु खः । सगरमाथायात सन् १८६५ सं ब्रिटिस सर्भेयर कर्णेल सर जर्ज एभरेस्टया नामं हे माउन्ट एभरेस्ट नां तःगु खनेदु ।

शेर्पा, राई आदिवासी नापं तिब्बतीतसं थौं तर्क नं हलिमय् हे दकलय् तजाःगु च्वापुगुं चोमोलुङ्मा खः धायेगु यानाच्वंगु दु । मेमेपिं नेपाःमिपिसं अक्वः यानाः सगरमाथा धायेगु याना वयाच्वंगु दु । नेपाःमि वाहेकया मनूतसं आःया अवस्थाय् सगरमाथा बाय् चोमोलुङ्मायात माउण्ट एभरेष्ट धायेगु यानाच्वंगु दु । हलिमय् अप्वसिनं हलिमय् च्वंगु दकलय् तजाःगु च्वापुगुं छु धाल धाःसा माउण्ट एभरेष्ट हे धायेगु याना वयाच्वंगु दु ।

नेपाःया शेर्पा आदिवासीतय्गु लागाय् च्वंगु हलिमय् दकलय् तजाःगु च्वापुगुंयात माउण्ट एभरेष्ट धायेगु यानाच्वंगु पायिछ मजू धकाः

प्रधानमन्त्री केपी शर्मा ओलीं न्वंवानादीगु खःसा उकियात न्त्यागु भाषां जूसां सगरमाथा हे धायेमाः धकाः तर्क वय्कलं वः बियादीगु खः । नां धैगु निगू वा स्वंगू जुइमखु । नां धइगु छु खः व हे जुइमाःगु तर्क प्रधानमन्त्रीं तयादीगु जुल । प्रधानमन्त्रीं हलिमय् दकलय् तजाःगु च्वापुगुंयात न्त्यागु हे भाषां जूसां सगरमाथा धायेमाः धकाः धयादीगु इलय् सगरमाथा धकाः नां तये न्त्यः अक्व धाये माउण्ट एभरेष्ट धकाः नां तये न्त्यः हे अनया आदिवासीतसं थःपिनिगु हे भाषां चोमोलुङ्मा धायेगु याना वयाच्वंगु खँ त्वःमकें मज्यू । हलिमय् दकलय् तजाःगु च्वापुगुंया वास्तविक नां सगरमाथा नं मखु माउण्ट एभरेष्ट नं मखु । थ्व निगुलिं नां लिपातिनि तःगु खःसा वास्तविक नां ला चोमोलुङ्मा खः । चोमोलुङ्मा उगु च्वापुगुंया पहिचान खः । अनया आदिवासी शेर्पा समुदायया पहिचान नापं इतिहास, आस्था व विश्वास नाप स्वानाच्वंगु दु । गथे कि थौंकन्हय् मुक्कुमलुङयात पाथेभरा धकाः नां तयातःगु पायिछ मजू धकाः लिम्बुतसं आन्दोलन यानाः सः तयाच्वंगु दु । मुक्कुमलुङ धइगु थःपिनिगु आस्था व विश्वास नाप थःपिनिगु पहिचान नाप स्वापू दुगु थाय् खः धायेगु यानाच्वंगु दु । अथे हे चोमोलुङ्मा नं शेर्पातय्गु पहिचान नाप स्वापू दुगु खँ खः । उकिं प्रधानमन्त्री केपी शर्मा ओलीं मूल रुपं सगरमाथा नां धायेगुसिवें नं चोमोलुङ्मा धकाः धायेगु आँट यायेमाः । धात्यें माउण्ट एभरेष्ट सगरमाथाया नां चोमोलुङ्मा तयेफत धाःसा नेपाःया हे पहिचान अक्व च्वन्त्याः वनी । नेपाःया मौलिकतायात त्यंकाः तयेफइ । नेपाःया म्हसिका हलिमय् थ्यंकेगु नितिं मेगु पलाः छिउगु जुइ । नां नाप यक्व खँ स्वानाच्वनी । नां नाप इतिहास, पहिचान, सभ्यता, संस्कृतिनिसं यक्व खँ स्वानाच्वंगु दइ । उकिं हे नेवाःतसं नं थःपिनिगु थाय्वाय्वा नां मौलिक नां तयेगु अभियान न्त्याकेमाःगु आवश्यकता दु । गबलय् तक थःपिनिगु थाय्वा नां थःपिनिगु हे भासं त्यनाच्वनी अबलय् तक व थाय् थःपिनिगु हे थाय् जुइ । गबलय् व थाय्वा नां नं मेपिनिगु भासं जूवनी अबलय् व थाय् थःपिनिगु धकाः धायेगु आधार तर्क मदयावनी । थःपिनिगु थाय् नं मेपिनिगु थाय् कथं जुयावनी । थःपिनिगु थातथलो अर्थात थाय्वाय् जब दइमखु उमित अनया आदिवासी तर्क धायेगु आधार मदयावनी । उकिं स्वनिगःया आदिवासी नेवाःतसं नं थःपिनिगु थाय्वाय्वा नां अतिक्रमण जुया वनाच्वंगु, खसकरण जुया वनाच्वंगु अले लाक्व पाक्व नां तया वनाच्वंगुयात ध्यानय् तयाः पुलांगु हे प्राचीन नां कायम यायेत स्वयेमाः । थुकिया नितिं स्थानीय सरकारयात ध्यानाकर्षण यायेगु नापं थाय्वाय् या नांया बारे जागरण अभियान हे न्त्याकेमाःगु दु ।

[illegible]

हल्चोक आकाश भैरव व आकाशदेवी



नृपेन्द्रलाल श्रेष्ठ

हल्चोक आकाश भैरव भिनिदैँ जात्रा २०८२ वैशाख महिनायकं थुगुसी जुयाच्चंगु दु। नेवाः जाति दुने पुतुवार समुदायपिसं थुगु जात्रा न्ह्याकाच्चंगु खः। हल्चोक यँया बसन्तपुरं ५ किलोमिटर नाप स्वयम्भु लिउने च्वंगु थाय् खः।

यँयाः (इन्द्रजात्रा) जात्राय् चण्डी, कुमारी व श्री हल्चोक आकाश भैरव यानाः स्वम्ह द्यः पिहां वइगु खः। यँय् च्वपिसं सवः द्यः नाप सवः भक्कु न धायेगु याः। भिनिदैँ जात्राय् धाःसा भिम्ह द्यः पिहां वइगु परम्परा दु। जात्राय् संलग्न जुयाच्चपि थौकन्त्यः ८४ म्ह गुथियारपिं दु। न्हापा गुथिइ मिसापिं दुकायेगु मयाः।

वंगु प्यदं न्ह्यःनिसें गुथिइ मिसापिं नं दुकायाः न्हूगु सुरुवात याःगु दु। गुथिइ नाइके कथं सागर पुतुवार व सुरज पुतुवार व भिनिदैँ जात्रा न्ह्याकेगु नितीं श्री हल्चोक आकाश भैरव समाज गठन



याःगु खःसा समाजया नायः शेरबहादुर पुतुवार जुयाच्चंगु दु।

भिनिदैँ जात्राया निती द्यः जुइपिं ब्याहा मजूपिं जुइमाःगु परम्परा दु। भिनिदैँ जात्रा न्ह्याबलेँ वैशाख महिनायकं जुइगु याइ। द्यः जुइपित निला न्ह्यः फागुन महिनायकं हल्चोक द्यः छैय् प्रशिक्षण बिइ। न्हापा भिनिदैँ जात्राय् सु द्यः जुल वं उम्ह हे द्यःयात प्याखं स्यनेगु याइ।

ख्याःपाः दय्केगु ज्याय् न्यागू दशकनिसं तेजबहादुर चित्रकार

द्यःया ख्वाःपाः दयेकेगु नितीं चैत्र १ गते चित्रकारया थाय् गुथियारपि वनेगु याइ। जात्रा शुरु यायेत न्हूगु ख्वाःपाः दयेकेमाः। चित्रकार चाः यात विशेष पूजा याना समयबजि छायाः हँय् बलि बियाः ख्वाःपाः दयेकेगु ज्या ह्याकी। ख्वाःपाः दयेकाः लँपु छायेगु ज्या क्वचायेका चित्रकार हे पुजा याना हँय् बलि बियाः समयबजि नं छायेमाः। पुजा क्वचायेका बहनिइ द्यःया ख्वाःपाः च्वम्ह चित्रकार सहित गुथ्याःया नाइके स्वम्ह यानाः प्यम्हेस्या भव्य नयेमाः। वयां लिपा गुथिया नाइकेयात चैत्र महिनाया लिपागु दिं ख्वाःपाः लःल्हायेगु याइ। ख्वाःपाः लियागु सद्रुक्य तयाः गुथियारपिसं क्वबिया हल्चोकय् लिहां वनी।

यँया मासंगल्ली च्वनादीम्ह तेज बहादुर चित्रकार थौकन्त्य ८६ दँ दयेधुंकुम्ह वय्कलं बि.सं. २०२८ सालनिसं ख्वाःपाः दयेकेगु ज्याय् याना वयाच्चंगु दु। वय्कःया अबु न्हापानिसं श्री हल्चोक आकाश भैरव द्यःया ख्वाःपाः दयेकेगु ज्या याना वयाच्चंगु खः।

वय्कलं नं उगु ज्यायात निरन्तरता बियाः थौं तक मदिकक याना वयाच्चनादीगु दु। यँयाः इलय् स्वम्ह द्यः चण्डी, कुमारी व श्री हल्चोक आकाश भैरव द्यःया ख्वापातय् लँपु छायेगु



यायेमाः। भिनिदैँया जात्राया नितीं ख्वाःपाः दयेकेत जात्राया लच्छि न्ह्यः हे पुलांगु ख्वाःपाः छगः बाकसय् तयाः हल्चोक निसं कुबिया हयाः पुंया छैय् तयेहइ। अले विशेष कथं हँय् बलि बियाः समयबजि छानाः चित्रकारपाखें पुजा यानाः न्हूगु ख्वाःपाः दयेकेगु ज्या न्ह्याइ।

चैत्र मसान्त कुन्हु स्वम्ह गुथियार व ख्वाःपाः दयेकूम्ह चित्रकार छम्ह यानाः सकल देवगणया ख्वाःपाः पुजाः यानाः फैं बलि बियाः समयबजि छानाः पुजा याइ। पुज्याये धुंकाः भव्य नयाः पुंपाखें गुथि नायःयात जात्राया नितीं ख्वाःपाः

बजि न्याफा
स्याबजि भिफा
ला - छ धानि
भुति - छमना
मुस्या - छमना
पालु - वगल (४ पाउ)
तेजबहादुरं २०३४, २०४६, २०५८, २०७० व २०८२ साल यानाः न्याकः तक न्हूगु ख्वाःपाः दयेके धुंकूगु दु।

द्यः कायेत वनेगु

जात्राया न्हापागु दिं वैशाख १ गते सुथं न्हापां बिजोड ल्याखय् गुथियारपि मू द्यः काःवनेगु निती जामोच्चय् जंगल



लःल्हानाबी। ख्वाःपाः दयेकादीम्ह तेजबहादुर चित्रकारया थाय् लुयावःगु वि.सं. १९६३, नेपाल लिपि च्यायातःगु छपाः भवैतय् ख्वाःपाः दयेकेत माःगु हलज्वलं धकाः थुकथं न्ह्यथनातःगु दु।

पुजा ज्वलं

हँय् - छम्ह
बजि - फच्छि
चुनू जाकि - कूछि
स्याबजि - भिनिम्हना (१२ माना)
भुति - चकाछि
मुस्या - चकाछि
पालु - १ पाउ
ख्वाःपाः दयेकेत माःगु हलज्वलं
खाडि - ४ थान
म्हैय्पा - प्यपाः
भांग्रा - प्यपाः
छुचुं - फच्छि
चा न्हाया मिले यायेमाःगु सरजाम
साल. धू - ४ पाउ
मिं - २ पाउ
नालु - २ पाउ
कपाय् - ४ तोला
कस्तुरी - ६ म्हय्
नेपाः फैं - छम्ह

दथुइ छहारे धइगु थासय् वनेगु याइ। अन जंगलय् दथुइ भैरव द्यः बिरामन जुयाच्चंगु दु। गुथियारपिसं पुजा यानाः समयबजि नयाः बाजं (भूयालि, खिं) चिलाखें व तरवार तथा सुलेगु याइ। गुथियारपिनिगु धापु कथं बाजनय् द्यः बिज्यात धाःसा बाजं अथे बजेय् जुइ।

चिलाखय् द्यः बिज्यात धाःसा चिलाख सिना हाकन अथे च्याइ। छुकय् द्यः बिज्यात कापतं प्वचिना हयाः द्यः छैय् हयाः जात्रा न्ह्याकेगु याइ। थुगुसि चिलाखय् द्यः बिज्यागु धकाः गुथियारपिसं धाःगु दु। द्यः कया वयेधुकाः लँय् सू नाप खँ ल्हाये मज्यू नाप लिफः तक स्वये मज्यू धकाः धायेगु याः। द्यः कयाहःपि गुथियारपित द्यः छैय् लसकुस याना द्यःयात दुकाइ। वयां लिपा जात्रा न्ह्याइ।

जात्राया न्हापागु दिं हल्चोकय् च्वंगु द्यः छैय् न्ह्यःने प्याखें हुइकेमाःगु प्रचलन दु। गुथिया नायःपाखे मू पूजा यानाः न्हापांगु दिंया जात्रा न्ह्याइ। प्याखें हुले क्वचायेकाः हल्चोक दुने पुतुवार बस्ति चाः हिलेगु याइ। उगु बस्ति चाः हिले सिधेयेका पंच बलि बीवं न्हापागु

दिंया जात्रा क्वचाइ।

जात्रा निन्हुया दिं २ गते निसं वैशाख महिनाया लिपागु दिं तक हल्चोक द्यःया ख्वाःपाः, वसः, तिसा व हतियार लियागु सन्दुकय् तयाः गुथियारतय्सं क्वबिया यँ महानगर १८ वडा तामिसपाखय् छगः चिबहाः नापं च्वंगु थासय् तयेगु याइ। अन तु हे वसः पुना ख्वाःपाः तयाः पिहां वइ। जात्रा क्वचायेवं हाकन अथे प्वचिनाः हल्चोकय् यंकी। जात्राया निन्हुकुन्हु वैशाख २ गते हनुमानध्वाका यँया कालभैरव न्ह्यःने प्याखें हुइकेमाःगु परम्परा दुसा छकः मरु दबुलि हुकेमाःगु प्रचलन दु। अथेहे मेगु इलय् यँया थीथी थासय् प्याखें हुइका जात्राया लिपागु दिं हल्चोकय् लिहां वनेगु याइ। जात्राया लिपागु दिं धाःसा द्यःपि तिसा वसः पुना, ख्वाःपाः सहित तामिसपाखानिसं लँदुच्छि पूजा कयाः हल्चोकय् लिहां वनी।

भिम्ह द्यः

श्री हल्चोक आकाश भैरव जात्राय् भिम्ह द्यःपि दु। चण्डी, कुमारी, श्री हल्चोकआकाश भैरव, गंगा, महाद्यः, पार्वती, श्री आकाश देवी, बाराही, महाकाली व दक्षिणकाली यानाः भिम्ह देवगणपि दु। चण्डी व कुमारी निम्हेसिया ख्वाःपाः ह्याउँग वसः नं ह्याउँग जुइ। श्री हल्चोक आकाश भैरवया वचुगु वसः, वचुगु ख्वाःपाः ल्हातय् तरवार दइ। गंगा व महाद्यः तुयुगु ख्वाःपाः जुइसा महाद्यःया ल्हातय् त्रिशुल ज्वनातःगु दइ। पार्वतीया वाउँग ख्वाःपाः व वाउँग वसः



वीलिसैं भिम्ह दःया भिनिदँया जात्रा



जुइ । श्री आकाश देवीया वाउँगु ख्वाःपाः व वाउँगु वसः जुइ । ल्हातय् धनुषवाण ज्वनातःगु दइ । महाकालीया वसः वचुगु व ख्वाःपाः नं वचुगु जुइसा दक्षिकालीया ह्याउँगु वसः व ह्याउँगु ख्वाःपाः जुइ । निम्हेसिया ल्हातय् खड्ग ज्वनातःगु दइ । जात्राया निला न्ह्यः निसैं द्यः जूपिंत तालिम बिइ । द्यः जूपि ब्याहा मजुपि जूइमाःगु चलन दु ।

दकलय् न्हापां गुरुपिसं म्ये हालां तामिसपाखय् द्यः ल्हाके धुकाः अन देवगणपि पिहांवयेगु याइ । दकलय् न्हापां चण्डी व कुमारी, अन लिपा श्री हल्चोक आकाश भैरव वया लिपा गंगा, महाद्यः व



पार्वती स्वयम् द्यःपि प्याखं हुलेगु याइ । वयां लिपा श्री आकाश देवी व बाराही धुंकाः महाकाली व दक्षिणकाली निम्ह प्याखं हुलेगु याइ । न्यागु चरणय् भिम्ह

द्यःपि प्याखं हुलेगु याइ । न्याम्हेसिया म्ये हालेगु याइसा खिं छ्वाः व भूयाली निगः बाजं दइ । म्ये व बाजंया तालय् द्यःपि प्याखं हुलेगु याइ ।

भिनिदँ जात्राय् मू द्यः कथं श्री आकाश देवीयात कायेगु याइ । धनुषवाण ज्वनाः आकाशय् स्वयाः प्याखं हुलेगु याइगुलि भूयालय्, कःसिइ च्वनाः स्वये मज्यू धकाः धायेगु याइ । बायुया द्यः कथं कयातम्ह आकाशदेवीया दृष्टि चुलातकि मनू वा भंगः कुतुं वइगु खं समाजया अध्यक्ष शेरबहादुर पुतुवारं कनादीगु दु । अथे जूगुलि आकाशदेवी व बाराही प्याखं हुलेगु इलय् द्यःया दृष्टि चुलाइ

जःलाखःला देय् भारतनिसे नेपाः थीथी जिल्ला तक पूजा याः वयाच्चंगु दु ।

न्हापा श्री हल्चोक आकाश भैरव भिनिदँ जात्राय् भिनिम्ह देवगणपि दुगु खः आः भिम्ह जक देवगण दु खं गुथिया नायः सागर पुतुवारं धयादी । न्हापा द्यः छैय् पुलागु जूगुलि उगु इलय् हे निपाः ख्वाःपाः खुयायंकूगु धकाः जितः आज्जुपिसं कनातःगु खः । उगु निपाः ख्वाःपाः किपूया बाघ भैरव द्यः नाप छ्वाः छैय् दु धकाः धयातःगु खं नं गुथिया नायः पुतुवारं कनादिल । आः नं अन भिनिदँ जात्राय् बाजं सः वः धका धायेगु याः धकाः धयादी ।



जात्राया सुरुवात

कलिगत सम्वत् ३८२२ (नेपाल संवत् १०७) य् जुजु गुणकामदेवयात म्हगसय् महालक्ष्मी द्यः न दर्शन बिउवःगु

जुयाच्चन । राज्यय् शत्रु भय पाखे मुक्त यायेगु खःसा भैरव द्यः स्थापना यायेत आदेश ब्यूगुलि जुजु गुणकामदेवं तान्त्रिक विधिं हल्चोकय् आकाश भैरव नाप थीथी द्यः स्थापना यागु खं वंशावली च्वयातःगु दु । लिपा थुगु राज्य कान्तिपुरया नाम विस्तार जूगु धापू दु । भिनिदँ जात्रा धाःसा अमर मल्लं न्ह्याकूगु धकाः वंशावली च्वयातःगु दु ।

थुगुसीया भिनिदँया जात्राया इवलय् न्हापागु दिं सम्मानीय राष्ट्रपति रामचन्द्र पौडल हल्चोकय् भायाः जात्राया अवलोकन यानादीगु खः । उकथं हे न्हापांखुसी गुर्जु पल्टन हल्चोकय्

ग्वाहालि याःगु दु । नार्गाजुन नगरपालिका वडा ३ पाखे नं जात्राया निति ग्वाहालि याःगु दु । जात्रा व्यवस्थापन यायेगु नितिं शेरबहादुर पुतुवारया अध्यक्षताय् ११५ म्हेसिगु दुजः दुगु कमिटी दयेकूगु खः ।

जात्राया दकलय् लिपागु दिं तामिसपाखा देवगणपिसं ख्वाःपाः लिसैं द्यः वसतय् थाय् थासय् पूजा कयाः लिहावनी । हल्चोकय् द्यः छैय् पुजारी लसकुस याना द्यःपिंत दुकायेगु याइ ।

ख्वाःपाः चुइकेगु परम्परा

भिनिदँ जात्राया ख्वाःपाः जात्रा क्वचाये धुका खुसिइ चुइकेगु चलन दु । ख्वाःपाः यँया स्वयम्भुइ मसिगाः धइगु खुसिइ चुइकेगु परम्परा दु । खुसि तसकं बाः वःगु इलय् चान्ह्यः १२ बजे चुइकेमाः धकाः समाजया अध्यक्ष शेरबहादुर पुतुवारं कनादिल ।

जात्रा गन गन जुइ

१ गते हल्चोक आकाश भैरव द्यः छै न्ह्येने, २ गते हनुमानध्वाका, ३ गते मच्छिन्द्र क्लव, ६ गते मरु, ७ गते खुसिबुं चोक, ९ गते हनुमानध्वाका, ११ गते असं, १२ गते दमाई त्वाः, १३ गते वतु, १८ गते न्यचपाःच्व, १९ गते पहिको त्वाः खुसिबुं, २० गते ब्रम्ह त्वाः, २१ तामिसपाखा, २४ गते बुराख्यः, २५ गते बहःति, २६ गते मखं, २७ गते न्ह्योखा, २८ गते भोछै, २९ गते जैशीदेगः, ३० गते ढल्को, ३१ गते तामिसपाखा, भेलु महादेव स्थान, डल्लु चौतारा व सिद्धार्थ चोक ।



बुद्ध शिक्षाया जः हवलेत बुद्धकालीन बाखनय् नेवाः फिल्म



विजयरत्न असंबरे

नेपाःया फिल्म
ख्यलय् तःदै मछि
ज्या यायेधुंकूठह
मेलिना मानन्धरं
पटाचाराया नापनापं
बांला मय्जु फिल्मया
निर्देशक राष्ट्रिय चलचित्र
पुरस्कार त्याकेत
ताःलागु खँ थनथाय्
लुमंके बहजू ।
निर्देशक रामकृष्ण
खड्गीया पटाचारा
फिल्म राष्ट्रिय
चलचित्र पुरस्कारय्
थःगु न्हाय् धस्वाकेत
ताःलातसा वयागु हे
कृषा गौतमी फिल्मं
अमेरिकाय् जूगु
आदिबासी जनजाति
फिल्म महोत्सवय्
थीथी सिरपाः त्याकेत
ताःलागु खः ।

बुद्धकालीन बाखनय् नेवाः फिल्मया बारे च्वसाः न्ह्याकेबलय् दकलय् लिपा पिहां वःगु फिल्म “कर्म” खः। निर्देशक रामकृष्ण खड्गीया “कर्म” नांयागु फिल्मया नां दकलय् न्ह्यु नाकथं वयाच्चंगु दुसा थ्वसिबें न्ह्यः निर्देशक अमृतचन्द्र श्रेष्ठया “घोषक” नं छगू बुद्धकालीन नेवाः फिल्मया रुपय् न्ह्यःने वःगु खः। थ्व निगुलिं फिल्म बौद्ध बाखं या नि कि बुद्धकालीन बाखंया लिधंसाय् दयेकातःगु नेवाः फिल्म खः। कर्म थ्व ख्यलय् दकल् लिपांगु फिल्म खः। रामकृष्ण खड्गीया निर्देशनय् पिहां वःगु थ्व फिल्मया बाखनय् छम्ह भन्तेया जीवनय् वइगु थीथी मारया खँ क्यनातःगु दुसा थथे मार वःगुया हुनिं वसपोलया पूर्वजन्मया फल खः धकाः तथागत बुद्ध कनाबिज्याइगु वसपोल भन्तेया पूर्वजन्मया बाखं हे कर्म फिल्मया बाखं खः। कर्म फिल्मया बाखं कथं मनूतय्सं थुगु जीवनय् याःगु कर्मया जक मखुसे पूर्वजन्मय् याःगु कर्मया फल नं भोगे यायेमा धकाः क्यनातःगु दु। बुद्ध धर्मय् छुं नं पाप वा पुण्यया फल गनं वनी मखु, व वयां त्वःति धइगु मान्यता दु।

थ्वहे मान्यता कथं घोषक फिल्मय् थुगु हे जीवनय् थम्हेसिनं याइगु कर्मया फल नं भोगे यायेमा धकाः क्यनातःगु दु। घोषक फिल्मय् छम्ह महाजनं थःगु जीवनय् याइगु कर्मया फलयात क्यनातःगु दु। निर्देशक श्रेष्ठ घोषक सिबें न्ह्यः “सेरी बन्जा” नांयागु छगू फिल्म नं बुद्ध शिक्षाया बाखंया लिधंसाय् दयेके धुंकल। सेरी बन्जाया हे बाखनय् निर्देशक अमृतमान महर्जनं छगू टेलि सिरीयल नं दयेकूगु दु। थथे छगू हे बुद्ध शिक्षाया बाखनय् निगू निगू नेवाः फिल्म पिहांवःगु आतकया निर्तिं थ्वहे जक जुइ।

घोषक फिल्मया निर्माण चिराग फिल्मसया निर्तिं प्रेमा शाक्य व रोशन वज्राचार्य जानाः मंकाः कथं याःगु खःसा थुके किशोर चिपालु, राजेन्द्रमान शाक्य, प्रेमा शाक्य, पल्पसा डंगोल, अन्नपूर्णेश्वरी श्रेष्ठ, सरस्वती मानन्धर नापनापं नेवाः फिल्मया लोकंह्वाम्ह हिरो राजु महर्जन व नेपाली फिल्मया छम्ह हिरो धीरेन शाक्यया नं अभिनय स्वये दुसा थुके अन्नजली शाक्य नांयाम्ह छम्ह न्हम्ह हिरोइन नं पिलूवःगु खः। कर्म फिल्मय् नेपाली फिल्मया

लोकंह्वाम्ह हिरो कर्मा शाक्य व नेवाः फिल्मया लोकंह्वाम्ह हिरोइन आशिष्मा नकःमिया नापनापं नेपाः देय्या नांजाम्ह ख्यालिजुजु मदनकृष्ण श्रेष्ठ व वलिसे नारायणदेवी प्रधान, अन्नपूर्णेश्वरी श्रेष्ठ, यमन श्रेष्ठ, लुनिभा तुलाधर, रजनी खड्गी, शोभा महर्जन, अनिता ताम्राकार, कृष्णभक्त महर्जनपनिगु नं मू भुमिका दु। कर्म सिबें न्हापा निर्देशक रामकृष्ण खड्गी पटाचारा, कृषा गौतमी थेंज्यागु निगू नेवाः फिल्म नं बुद्धकालीन बाखनय् हे दयेके धुंकूगु दुसा थ्व स्वंगुलिं फिल्मया निर्माण नेपाःया नांजागु फिल्म कम्पनी गुणसिनेमाया निर्तिं दिजेन्द्र (राजेन्द्र) शाक्य याःगु खः।

निर्देशक रामकृष्ण खड्गी व निर्माता दिजेन्द्र शाक्यया मंकाः कुतः कथं कर्म नापं यानाः स्वंगू फिल्म पिदने धुंकूगु दु। आः थ्वहे पुचलं प्यंगु फिल्म कथं बुद्धकालीन बाखंया हे लिधंसा कयाः मेगु फिल्म दयेकेगु खसाः ग्वयाच्चंगु दु। पटाचाराया खँ ल्हायेगु खःसा न्हापांगु नेवाः फिल्म “सिलु” निगूगु नेवाः फिल्म “राजमति” धुंकाः “बांला मय्जु” नांयागु फिल्म जक हलय् सार्वजनिक जूगु रेकर्डयात हाचांगाया हलय् हे क्यंगु प्यंगू फिल्म कथं पिदंगु खः। उलि जक मखुसे पटाचारा गुण हलय् सच्छिन्हू सिबें अप्वः न्हि तक लगातार क्यनेत नं ताःलागु खः। उलि जक नं मखुसे पटाचारा फिल्म नेपालय् राज्य स्तरं याःगु राष्ट्रिय चलचित्र पुरस्कारय् दकलय् बांलाःगु फिल्म, दकलय् बांलाम्ह हिरोइन कथं मेलिना मानन्धरं सिरपाः तर्क त्याकूगु फिल्म खःसा रामकृष्ण खड्गी थ्व फिल्मपाखें दकलय् बांलाम्ह निर्देशकया सिरपाः त्याकूगु खः।

नेपाःया फिल्म ख्यलय् तःदै मछि ज्या यायेधुंकूठह मेलिना मानन्धरं पटाचाराया नापनापं बांला मय्जु फिल्मया निर्तिं राष्ट्रिय चलचित्र पुरस्कार त्याकेत ताःलागु खँ थनथाय् लुमंके बहजू। निर्देशक रामकृष्ण खड्गीया पटाचारा फिल्म राष्ट्रिय चलचित्र पुरस्कारय् थःगु न्हाय् धस्वाकेत ताःलातसा वयागु हे कृषा गौतमी फिल्मं अमेरिकाय् जूगु आदिबासी जनजाति फिल्म महोत्सवय् थीथी सिरपाः त्याकेत ताःलागु खः।

नेवाः फिल्मया ख्यलय् पटाचारापाखे पलाः न्ह्याकूठह मेलिना



मानन्धरयात न्हापा राजमति फिल्मया निर्माण खसाः जुयाच्चंगु इलय् उगु फिल्मय् राजमति जुया म्हितेत “अफर” याःगु खः। तर उगु इलय् मेलिना थः बांलाक नेवाः भाय् मसः धकाः अफर रिजेक्ट याःगु खः। लिपा वनाः पटाचारापाखें न्ह्याःगु वयागु पलाः बांला मय्जु, कृषा गौतमी व धम्मवती तक थ्यन।

“धम्मवति” फिल्म बुद्धकालीन बाखंया लिधंसाय् दयेकूगु फिल्म मखु तर बौद्ध बाखं धाये वा बौद्ध धर्मात्मवीर्षिलसे तप्यंक स्वापू दूगु फिल्म खः। नेपालय् बुद्ध धर्म व बुद्ध शिक्षाया जः हवलेगुलिइ तःधंगु योगदान दुम्ह गुरुमां अण्णमहामन्थवाचक सासाधज धम्मचारिय गुरुमां धम्मवतीया जीवनीया लिधंसाय् दयेकूगु खःसा थ्व फिल्मया निर्देशक राज शाक्य खः।

नेपालय् धार्मिक भावनालिसे स्वापू दूगु म्हो जक फिल्म दयेकूगु दु। उकी मध्ये छगू श्रीस्वस्थानी खःसा मेगु जयबाबा पशुपतिनाथ खः। अले तिलहरी, महामाया, महादेवी थेंज्याःगु छगू निगू फिल्मय् नं धार्मिक भावनाया लिधंसा कयातःगु खनेदु। थुलि बाहेक खस नेपाली भासं टेलिभिजनय् पिलूवःगु फिल्मय् निर्देशक दुर्गाराज खरेलया “अंगुलिमाल”या नापनापं “विश्वन्तर” नांयागु छगू फिल्म नं बौद्धधर्म व बौद्ध शिक्षाया लिधंसाय् दयेकूगु फिल्म खः।

बौद्ध धर्म व बौद्ध शिक्षाया लिधंसाय् दयेकूगु थुपिं फिल्म बाहेक तथागत भगवान बुद्धया जीवनयात नेपाःया फिल्मय् आः तक नं न्ह्यःव्वःगु खनेमदुनि। खय्त ला हलिउड बलिउडय् भगवान बुद्धया बाखंयात थीथी कथं फिल्मय् क्यनातःगु खनेदु। तर, बुद्ध जन्मभूमि धकाः न्हाय् धस्वाकाच्चंगु नेपाःया हे फिल्मय्

तथागतया जीवनयात न्ह्यःव्वःगु मदुनि।

आःतक पिदंगु नेवाः फिल्मय् बुद्ध शिक्षा न्ह्यव्वयेत बुद्धकालीन बाखंया लिधंसा कयातःगु खनेदु। थ्व ख्यलय् दकलय् न्हापांगु पलाः न्ह्याकूठह निर्देशक मनिष श्रेष्ठ खः। थुके हिसिला महर्जनया मू भुमिका दुसाः मदनकृष्ण श्रेष्ठ, हरिवंश आचार्य, सुभद्रा अधिकारी लगायतया आपाल. नांजापि कलाकारपिसं अभिनय यानातःगु दु।

बुद्धकालीन बाखं वा बौद्ध जातक बाखनय् बुद्ध शिक्षाया खँ मू खँ जुयाः पिलूवइ। जातक बाखं जन्मजन्मया बाखं खः। सिद्धार्थ राजकुमार तथागत बुद्धया रुपय् जन्म जुइ न्ह्यःया बाखं जातक बाखं खः। जातक बाखनय् भगवान बुद्धया जन्मजन्मया बाखंया नापनापं विशेष यानाः बुद्ध शिक्षाया खँ कःधाना बाखं न्ह्यव्वयाः तइगु खः। अथेजुगुलिं बाखं न्यागू च्यागू लाइनया शिक्षाप्रद बाखंया लिधंसा कयाः निधौ स्वधौया फिल्म दयेकेगु कुतः याःपिं सकसिगु कुतःयात तारीफ यायेमा। तर, फिल्म दयेकेत माःकथंया घटनाक्रम, पात्र विस्तार अज्याःगु बाखनय् कयातःगु मदइगुलिं यानाः थ्वहे बाखंया लिधंसा कयाः फिल्मया स्कृनप्ले न्ह्याकेबलय् तसकं हे मिहिनेत याये मालाच्चनी। आःतक पिदंगु फिल्मय् बुद्ध शिक्षाया बाखंयात फिल्मया पर्दाय् तक हःबलय् गुलि सफल जुल धइगु आः चर्चाया विषय जुइमा। थुखेपाखे पलाः ल्हवःने हथाय् जुइ धुंकूगु खःसां तबि बुद्ध शिक्षा दूगु बाखंया लिधंसाय् पिहां वयाच्चंगु नेवाः फिल्मया पलाःयात च्वछाय् बहजू धायेमाः। थुखेपाखे पलाः न्ह्याका च्वपिंत सुभाय् देछाय् माः।

२५६५ औं बुद्ध जयन्ती श्रद्धापूर्वक हनाः पुण्य संचय याये ।

हरेक मंगलवाः

राष्ट्रियताको लागि समर्पित



मेरो साप्ताहिक
मेरा साप्ताहिक Mero Saptahik

मालाः मालाः ब्वनादिसँ ।

२५६५ औं बुद्ध जयन्ती श्रद्धापूर्वक हनाः पुण्य संचय याये ।

01-4259713


01-4259029



Pancha Buddha Jewellers

Naghal Tole, Kathmandu

Customers' Satisfaction is our Motto



Remember Us for Exclusive Gold Jewelleries and Silver Items



@panchabuddhajewellers

नेवाः प्रविधि व शिल्पकारिताया बारे बृहत गोष्ठी



लहना वाःपौ/ नेपालभाषाया वाङमय ख्यः धइगु भाषा , संस्कृति , साहित्य , कला व संगीतख्यलय् जक मखु मेमेगु ख्यलय् नं उतिग्यंक हे दु धइगु खँयात न्ह्यःने हयेगु तातुना कथं नेपालभाषा एकेडेमीया ग्वसालय् नेवाः ज्ञान व शिल्प प्रविधि सम्बन्दी छगू बृहत गोष्ठी जुइगु जूगु दु ।

वइगु वैशाख २७ शनिवाः यँया राष्ट्रिय सभागृहया हलय् जुइगु उगु गोष्ठीया बारे जानकारी बिइत वंगु शुक्रवाः छगू सहलह मुँज्या जूगु खः । उगु मुँज्याय् एकेडेमीया चान्सलर मल्ल के. सुन्दरं मू खँतःसे नेपालभाषाया वाङमय ख्यः धइगु भाषा, संस्कृति, साहित्य, कला व

संगीतख्यलय् जक मखु मेमेगु ख्यलय् नं उतिग्यंक हे दु धइगु खँयात न्ह्यःने हयेगु तातुना कथं नेपालभाषा एकेडेमी या ग्वसालय् नेवाः ज्ञान व शिल्प प्रविधि सम्बन्दी छगू बृहत गोष्ठी जुइगु खँ कनादिल ।

ज्याइवलय् चान्सलर मल्लं जानकारी बियादी कथं नेवाः सिंज्या सम्बन्धी, नेवाः बुँज्या सम्बन्धी व नेवाः प्रविधि व शिल्पकारितायात कयाः कार्यपत्र न्ह्यब्वइ ।

उगु गोष्ठी नेवाःख्यलय् ज्वमदुगु पलाः कथं न्ह्याइगु व थुकें आः तक सुलाच्वंगु नेवाः प्रविधि व शिल्पकारिताया आपालं पक्ष दुवालेगु ज्या जुइगुलिं सकलें नेवाः नुगः दुपित ब्वति कयादिइत नं ग्वसाः खलकं इनाप याःगु दु ।

संविधानं बिउगु ...

समुदायया हितय् ठोस ज्या यायेमाःगु खँ धयादिल । स्यस्यःत नेवाः समुदाय दुने विकसित जूसां नं राज्यया नीति, भाषा, संस्कृतिइ यानाच्वंगु दमन यानाः प्रभावित जूगु धासैं वय्कलं संविधान बिउगु अधिकार छ्यलाः न्ह्याःवनेमाःगु खँ धयादिल ।

सम्बोधनया इवलय् वय् कलं धयादिल, ‘अधिकारया नितिं संगठनया महत्वपूर्ण भूमिका दइ । मातृभाषा, सांस्कृतिक सम्पदा, परम्परा, रीतिरिवाज व संस्कृतिया नितिं छप्पं जुयाः ज्या यायेमाः ।’ मंगलबजारं न्ह्याःगु च्याली नगरया थीथी थासय् चाःहिलाः यलध्वाखाया बालिफय् वनाः सभाय् हिउगु खः ।

च्यालीइ नेपालभाषा ल्यंकेनु, संस्कृति, सम्पदा ल्यंकेनु, अधिकार सहितया जातीय सद्भाव च्वयातःगु प्लेकार्ड ज्वनाः मिसा पुचःया लिसे थीथी क्षेत्रय् ज्या यानाच्वीपिं समाजया दुजः पिनिंसं ब्वति काःगु खः । च्यालीइ यलया क्षेत्र नं ३ का सांसद डा. तोसिमा कार्की नं ब्वति कयादीगु खः ।

नेवाः समुदाय दुनेया श्रेष्ठ, जोशी, प्रधान, अमात्य, मल्ल व कर्माचार्य स्यस्यः अन्तर्गत लाः । मल्लकालय् शासन सत्ताय् दुपिं स्यस्यःत आधुनिक नेपाःया निर्माण लिसें गुलिं जागिर सा गुलिं स्वनिगः त्वःताः वनेमाःगु खः । नेवाः समुदाय दुने आर्थिक स्थिति, शिक्षाय् पहुँचया ल्याखँ सबल दुसां नं नेपालभाषा, संस्कृति तना वयाच्वंगु व पहिचान हे मदइगु खँय् चिन्ता प्वकूसें संस्थागत रूपय् न्ह्याःवनाच्वंगु समाजया अध्यक्ष नवीनमंगल जोशीं कनादिल ।

अध्यक्ष जोशीं न्ववाय्गु इवलय् धयादिल, ‘आदिवासी जनजाति नेवाः समुदाय दुनेया महत्वपूर्ण जातया रूपय् दुगु स्यस्यःतय् बसोबास थौंकन्हय् छथाय् मखुसें थीथी थासय् न्यनाच्वंगु दु । थ्व अवस्थाय् पहिचानया अवयवया रूपय् दुगु भाषा, संस्कृति, नेवाः

सभ्यतायात प्रवर्द्धन यायेत समाज संगठित रूपय् न्ह्यानाच्वंगु दु ।

उक्तं हे ज्याइवलय् न्ववायेगु इवलय् वाम्पती प्रदेशका श्रम, रोजगार तथा यातायातमन्त्री प्रेमभक्त महर्जनं संधीयता, लोकतन्त्र बल्लाकेत समुदायया म्हसिका व विकास महत्वपूर्ण जूगु खँ धयादिल ।

स्थापना दिवस न्याय्केगु इवलय् स्यस्यः समाजं नेवाः समुदायया हक अधिकार व एकतायात बः बिउगु दु । समुदायया मंकाः सरोकार व हितयात थवंथवय् समन्वय, सहकार्य चूलाके फइगु खँ समाजया सचिव चन्द्रकृष्ण श्रेष्ठया धापू दु ।

स्यस्यः समाज संगठित जुयाः न्ह्याःवनेवं यलय् क्रियाशील नेवाः समुदायया थीथी जातिया मंकाः व प्रतिनिधिमूलक संगठन यल नेवाः समाजया प्रभावकारी व क्रियाशीलतायात नं बः बिउगु खँ नं सचिव श्रेष्ठं कनादिल ।

नेवाः समुदायया २१ जाति आः छगू हे संरचना न्ह्यानिगु कथं स्थापना जूगु यल नेवाः समाजय् कर्माचार्य, कपाली, खड्गी, चित्रकार, ज्यापू जोशी, तण्डुकार, ताम्रकार, द्यःला, नकमी, नापित, वाद्यकार, बाराही, बौद्ध विहार संघ, रजक समाज, रञ्जितकार समाज, राजोपाध्याय, स्यःस्यः, सिकःमी व शिल्पकार समाज दुथ्याः ।

नेवाः समुदाय दुनेया थःथःगु जातिया घेरां संगठित जइगुया लिसें मंकाः कथं क्रियाशील जुइमाःगु खँ समाजया उपाध्यक्ष न्हुच्छेबहादुर नेम्कुलं धयादिल । थःगु जाति दुने न्ह्याना वयाच्वंगु संस्कार, रीतिरिवाजया संरक्षणया लिसे नेवाः समुदायया हकहित, नेपालभाषा, संस्कृति व परम्परायात ल्यंकेत बिस्कं बिस्कं ज्या याना वयाच्वंगु अज्याःगु संगठनं एकीकृत रूपय् समन्वय यानाः न्ह्याःवनेत समाजं कुतः याना वयाच्वनागु खँ उपाध्यक्ष नेम्कुलं कनादिल ।

“दाइचा मैचा” व म्यूजिक भिडियो “मैचा छ बांलाका...” पिन

लहना वाःपौ/ ज्यापू सुनील (शुक्रराज महर्जन) व लक्ष्मी महर्जनया न्हापांगु न्ह्यब्वया ज्यापू सुनील (शुक्रराज महर्जन) या याकः च्वसाय् नेपालभाषाया म्येचाः “दाइचा मैचा” व नेपालभाषाया म्यूजिक भिडियो “मैचा छ बांलाका” या लोक गायक वरिष्ठ म्ये हालामि/लय् चिनामि रत्न बेहोशीया मूपाहाँसुइ खपिन्छैं त्वाःया भैरव लाछिइ छगू ज्याभ्रवःया दथुइ पितब्वज्या जुल ।

वरिष्ठ संगीतकार जुगल डंगोल व संगीतकार अनिल तुलाधरया संगीत व संयोजन दुथ्याःगु नेपालभाषाया म्येचा “दाइचा मैचा” ज्यापु सुनील व लक्ष्मी महर्जनया सः दुथ्यानाच्वंगु दु । उकी मुक्कं खुपू म्ये दुथ्या । थुगु हे म्येचाःया छपू म्ये “ मैचा छला बांलाका ...” बोलया म्येया म्यूजिक भिडियो नं पितब्वज्या जूगु खः ।



वरिष्ठ निर्देशक सुरोज महर्जनं निर्देशन यानादीगु म्येया सिनेमाटोग्राफी/सम्पादनसोहनमानन्धर जुयादीसा वरिष्ठ मेकअप कलाकार सनमकुमार श्रेष्ठ खः ।

पिदंगु म्यूजिक भिडियोया मू कलाकार स्रजल महर्जन व फेना महर्जन, श्यामलाल महर्जन, मीरा तण्डुकार, अन्जु तण्डुकार, कल्पना बडेल, मचा

कलाकार मुनिच महर्जन, अदिती महर्जन, रिट्ना बडेल अभिनय याःगु खः । ज्याभ्रवलय् पाहां कथं भायादीपिं वरिष्ठ संगीतकार राजु सिंह, वरिष्ठ म्ये हालामि जुजुकाजी रंजित, संगीतकार जुगल डंगोल, निर्देशक सुरोज महर्जन नापं खपिन्छैं त्वाःया त्वाः नायः राजमान अवालें भिंतुना न्वचु बियादीगु खः ।

व्यञ्जनकार व लम्साल भ्रमण खर्च बेरुजु



लहना वाःपौ/यँ महानगरपालिकाया मेयर बालेन साहया निर्देशनय् नियम अःखः फ्रान्स भ्रमणय् वीपिं मेयर सचिवालयया कुमार व्यञ्जनकार व सुनिल लम्सालया भ्रमण खर्च असुल यायेत महालेखा परीक्षकया कार्यालयं यँ महानगरपालिकायात पौ च्वःगु दु ।

व्यञ्जनकार व लम्साल भ्रमणय् वंगु २० लाख तका बेरुजु खनेदुगुलिं महालेखा परीक्षकया कार्यालयं पौ च्वःगु खः । वंगु दँय् फ्रान्सय् मे १४ निसे २५ तारिख तक जूगु ७७ क्वःगु चलचित्र महोत्सवय् ब्वति कायेत मेयर साहयात ब्वनापौ वुः खःसा नियम अःखः सचिवालयया दुजःपिं वनाः महागरपालिका २० लाख तक याःगु



खर्च बेरुजु धासैं महालेखा पौ च्वःगु खः ।

सूत्रया कथंयँ महानगरपालिकाया तत्कालीन प्रमुख प्रशासकीय अधिकृत प्रदिप परियारं मेयर साहया आदेश कथं कानुन अःखः मेयर सचिवालयया निम्ह दुजःतय्त फ्रान्स छ्वयेगु निर्णय याःगु खः ।

मेयर साहया सचिवालयया कर्मचारीयात फ्रान्स भ्रमणय् यंकूगु विषयं अखितयारं नं यँ महानगरपालिकायाके भ्रमण विवरण प्वंगु खःसा उगु विवरण आः तक नं बिउगु मदुनि ।

सूत्रया कथं तत्कालीन प्रमुख प्रशासकीय अधिकृत परियारं व्यञ्जनकार व लम्सालया

खर्च जूगु ध्यबा भुक्तानी यायेत यँ महानगरपालिकाया वित्त विभागयात पटक पटक दबाब बिउगु खः । सूत्रया कथंयँ महानगरपालिकाय् जूगु आर्थिक हिनामिनाया भ्रिंयंगू घटनायात कयाः प्रधानमन्त्री तथा मन्त्रिपरिषदया ज्याकुथिइ उजुरी लानाच्वंगु दु ।

वंगु दँया असार १० गते च्वंगु कार्यपालिका बैठकय् मेयर साहया सचिवालयया दुजःपिनिगु भ्रमण खर्च अनुमोदन यायेगु कुतः मेयर साहं याःगु खः । उकिया नितिं बैठकया प्रत्यक्ष प्रसारण तक मेयर साहं याके मबिउगु खः । उगु न्हिंया बैठकय् खर्च अनुमोदन यायेगु एजेन्डा हे मदुगु खःसा बैठकय् च्वीपित जानकारी तक मबिउसे एजेन्डा अनुमोदन याःगु खःसा उकियात प्रमुख प्रशासकीय अधिकृत परियारं प्रमाणित याःगु खः ।

कार्यपालिका बैठक क्वचायेवं प्रमुख प्रशासकीय अधिकृत परियारं मेयर साहया आदेश कथं एजेन्डाय् मदुगु खर्च अनुमोदन यानाः प्रमाणिकरण याःगु खःसा वित्त विभागं भुक्तानी बिउगु खः ।

२५६५ औं बुद्ध जयन्ती

श्रद्धापूर्वक हनाः पुण्य संचय याये ।

दया नन्द शाक्य, प्रोप्राइटर

शाक्य ज्यासः पसः

थाय्मरु, यँ । ९८४१४४९५५५

द्यःया किकिंपालिसें थीथी कथंया तिसा ज्वलंत

दयेकादीमाःसा वा न्यानादीमाःसा लुमंकादिसँ ।

प्रचलित नेपाललिपिं पिहाँ वयाच्वंगु

म्हसीका लय्पौ ब्वनादिसँ/ब्वंकादिसँ

महीना लय्चा

MHASIKA Monthly | म्हसीका मासिक

२५६५ औं बुद्ध जयन्ती
श्रद्धापूर्वक हनाः पुण्य संचय याये ।



बि. आर्ट्स

कीर्तिपुर न.पा. नयाँबजार, पाँगा दोबाटो

फोन नं. : ०१-४३३४४५१, ५८४१३६५५२

**Flex Print | Sticker Cutting
Offset Print | Visiting Card
ID Card | Stamp**



२५६५ क्वःगु बुद्ध जयन्ती
श्रद्धापूर्वक हनाः पुण्य संचय याये ।



डा. महेशमान श्रेष्ठ
क्षेत्रपाटी, यँ ।

२५६५ औं बुद्ध जयन्ती
श्रद्धापूर्वक हनाः पुण्य संचय याये ।



City Office:
Newa: Huga Complex, Om Bahal, Kathmandu, Nepal
Tel: 4268121 | Email: booking@chhaimalesort.com.np
CHHAIMALE RESORT Pvt. Ltd. | Ramche Bhanjyang, Chhaimale-13, KTM
Resort No.: 01-6924909, 9851181409
www.chhaimalesort.com.np | www.facebook.com/chhaimalesort



२५६५ औं बुद्ध जयन्ती
श्रद्धापूर्वक हनाः पुण्य संचय याये ।

प्रोप्राइटर मोति शाक्य

९८४१०३३७२३

स्वर्ण आभूषण

टंकेश्वर, काठमाडौं, फोन : ०१-५१२३०८९



२५६५ औं बुद्ध जयन्ती
श्रद्धापूर्वक हनाः पुण्य संचय याये ।



**गहना गाडन
गहना गार्डेन**

(For Quality and Designed Gold & Silver Jewellery)
Shop : Indrachowk, Bhedasingh (Opposite Nepal Bank)
Phone: 4224108, 4222985, 9841200009



२५६५ औं बुद्ध जयन्ती
श्रद्धापूर्वक हनाः पुण्य संचय याये ।



माडन नवाः रुक्मिणी स्कूल
Modern Newa English School



२५६५ औं बुद्ध जयन्ती
श्रद्धापूर्वक हनाः पुण्य संचय याये ।



सुवर्णकेशरी चित्रकार
समाजसेवी

विद्यार्थी भर्ना अभियानमा सबैले योगदान गरौं

- विद्यालयले आ-आफ्नो सेवा क्षेत्रभित्रका अभिभावकलाई टेलिफोन, इन्टरनेट, रेडियो, टेलिभिजन तथा सामाजिक सञ्जालबाट सूचना प्रवाह गर्ने,
- अभिभावकविहीन बालबालिकाको अध्ययनमा सहयोग गर्ने व्यक्ति तथा संस्थाको पहिचान र उचित सम्मान गर्ने,
- सामुदायिक सिकाइकेन्द्रहरूले विद्यालयबाहिर रहेका बालबालिकाको लगत संकलन गर्ने,
- सार्वजनिक जीवनका व्यक्तिहरूले विद्यालय उमेर समूहका सीमान्तकृत समूहका, अपाङ्गता भएका बालबालिकाका लागि विद्यालय भर्नाको पहल गर्ने,
- स्थानीय तहले भर्ना अभियानको नेतृत्व गर्ने ।

सबै बालबालिकाको विद्यालयमा सहभागिता, गुणास्तरीय शिक्षा प्राप्तिको सुनिश्चितता ।



नेपाल सरकार

विज्ञापन बोर्ड



छत्रपाटी निःशुल्क चिकित्सालय (अस्पताल)

"स्त्रीय शुलभ स्वास्थ्य सेवा सकसियां निति, असहायता निति जक निःशुल्क"

उपलब्ध सेवा

- २४सी घण्टा सेवा**
- इमरजेन्सी
 - प्याथोलोजी
 - एक्स रे
 - ई सी जी
 - औषधि पसल
 - अन्तरंग सेवा

शल्यक्रिया

- मोतिविन्द
- स्तरस कर्तरी
- नाक बास घाँटी सम्यन्धि
- हाडतोर्नी तथा नाक सम्यन्धि
- बिना चिकित्सा विषाद नशीबो पत्थर सम्यन्धि

बाहिर सेवा

- मुटु रोग
- फेफ रोग
- युरोलोजी
- स्त्री रोग
- बाल रोग
- कवचान्तर रोग
- चर्म रोग
- आँखा रोग
- जनरल मेडिसिन
- बर्म तथा बीज रोग
- नाक कान घाँटी रोग
- जनरल हेल्थ चेक अप
- नाइरोइड
- मधुमेह

मेमेसु सेवा

- टेसिङ
- इण्टेलिक्पी
- फोलीनोस्कोपी
- फिजियोथेरापी
- इन्ट्रानाउट्रुक्लर टुप्पर र इको
- युरोपेली लुटको इन् प्रोसेसना
- टि.एम.टि. हल्टर



**२४ घण्टा
इमरजेन्सी सेवा**

७०८ गंगालाल मार्ग, छत्रपाटी, काठमाडौं, फोन: ५३९६९३८, ५३५७९९९, ५३६६२२९